



Viva sin la sessiun gartegiada: Lorenzo Schmid, president communal dad Arosa, Duri Campell, president dal cussegl grond e Pascal Jenni, il directur turistic (da san.).



Christina Bucher Brini (ps) ed ed Ernst Casty (pbd) durant in saut.

FOTOS G. N. STGIER

Populaziun e parlament en luna da festa

Finiziun da la sessiun extra muros dal cussegl grond

DA GION NUTEGN STGIER / ANR

■ **Ils abitants da la vischnanca dad Arosa èn vegnids gugent a la festa populara ed a l'inscunter cun ils represchentants dal parlament chantunal. L'atmosfera è stada fitg agreabla e cun lur producziuns han furmaziuns localas la simpatia dals deputads e da las deputadas.** Tar la sessiun extra muros dal cussegl grond è er tradiziun che la populaziun dal lieu ospitant s'inscuntra cun ils represchentants e las represchentantas da noss parlament. Per ils abitants dad Arosa è quel inscunter stà il punct culminant da la sessiun da zercladur dal cussegl grond. Quai ha er ditg *Lorenzo Schmid*, il president communal da la vischnanca ospitanta. La sessiun extra muros dal cussegl grond saja ussa gia istorgia e la speranza e la tema che tut gartegia er. «Jau sper che Arosa saja sa mussà da la sia meglra vart e che la vischnanca haja adempli il num dad esser in bun lieu ospitant», ha ditg *Lorenzo Schmid*. El ha lura er engrazià a la regenza ed a l'entir parlament dad avair resguardà Arosa sco lieu per la sessiun ordvart Cuir. Bler laud ha il president communal er drizzà als represchentants dals meds da massa che hajan mess per bunamain in'emna Arosa en il focus da la pressa grischuna.

«Sunter mesanotg vegn segir empermess tut»
Lorenzo Schmid ha lura er appellà als preschents da tschertgar il contact cun ils parlamentararis e dar vinavant lur giavischs a quels. Da quella opiniun è er stà *Duri Campell*, il deputà ch'è anc per dus mais e mez president dal cussegl grond. «Avajas

nagina retegnientscha da discurre e da dar vinavant als parlamentararis voss giavischs», ha ditg il pli aut *Grischun*. *Duri Campell* ha lura er manegià che suenter mesanotg vegnian las deputadas ed ils deputads segir ad empermetter e la damaun saja tgunsch pussavel che tuts hajan gia emblidà lur empermischuns. Cun quels peds ha el procurà tar tuts en tenda per in rir ed er retschet in ferm applaus.

Musica, jodel e comic

La festa da finiziun è vegnida enritgida cun in bel program cultural cun furmaziuns da la regiun. Attratg en in culp la simpatia da l'entira raspada han cunzunt igls 15 giuvenils da la Scola da musica Scanvetg che han sunà cun plaschair e diligent lur orgelets. Da sentir quella furmaziun è stà in deletg musical e quai en tuttas modas e manieras. Dals 170 absolvents da la scola da musica en il Scanvetg sunan gist 53 l'orgelet svizzer e quai è bain in'onur envers la musica populara che er blers giuvenils han gugent. Il Chor da jodladers Arosa ha lura testifigà che er quella cultura viva en vischnanca. Da quella purschida ha cunzunt cusseglier guvernativ *Martin Jäger* gi grond plaschair, el sco jodlader activ. Arosa ha ils davos 25 onns er fatg in num sco lieu dal festival umoristic e per quella part culturala è stà responsabel il cabarettist grischun *Rolf Schmid*. Sautà è lura er anc vegni grazia a la musica da la capella Butzerin e cun dar in egl sin tribuna han ins gi l'impressiun che la colliaziun da glistas tranter las partidas saja realitad, almain per intginas uras cun sautar las dunnas da la ps cun ils umens da la pps e las deputadas da la pld cun ils deputads da la pcd ed uschia vinavant.



Jodlar ha er ad Arosa ina tradiziun.



Els han procurà cun lur musica per blers plaschairs.



Cussegliera guvernativa Barbara Janom-Steiner (da mez) cun in per da la regiun.



In deputà da Surses cun dus Surmirans che vivan ad Arosa: Filip Dosch, Emil Plaz e Georg Devonas (da san.).



Diverti il public ha er il cabarettist Rolf Schmid.



Entupà enconuscents tar la festa populara a la fin da la sessiun ha er cusseglier guvernativ Jon Domenic Parolini.